

671.1267
078
16

大城縣志

卷之九

人物志元

儒林 鄉獻

高義 文苑

循吏

大城縣志卷之九

上

上元趙炳文重修

吳縣徐國楨鑑定

人物志

孔子曰十室之邑必有忠信況雷封百里哉古者建
豐功偉烈爲千秋景仰者大抵出乎一邑之間如韓
文公出於孟縣歐陽子出於廬陵是也平舒自明以
來偉人遞出若梁司徒李司馬劉司寇莫不光昭宇
宙此外儒林循吏文苑孝友義烈節婦仙釋諸人類
能言坊行表可信今而傳後微特一邑之光實盛朝

之瑞也非數百年培養能如此乎故志之

儒林志

兩漢首重儒林宋史復立道學傳以爲高於儒林其實道學與東漢黨錮同非道學果高於儒林也我朝畿輔大儒輩出平舒儒者亦接踵而起可入北學編者數人表章絕學發明聖道維持風化樂育人才皆此數公之力迄今淵源勿替此儒林志之所爲作也

王圖永傳

王圖永字甯寰大城人父紹堯明隆慶三年拔貢生知

汶上縣有惠政圖永幼英敏補弟子員每試必冠軍數
赴秋闈幾售而復落者屢萬歷壬寅以選貢授河南尉
氏縣訓導講誦不輟士風丕變傳當種花羊城乃私禱
曰倘得國學一席徧覽石鼓銅斗之文庶幾可了一生
何須五斗折腰爲果轉北雍典簿一味澹泊出其俸金
羅古今書籍浸灌其中下筆千萬言宏博奧衍見者以
爲秦漢文章六朝以下不及也恆爲輦下諸公所獎藉
時湯賓尹爲大司成覽其著述大奇之比之文中子之
流多所唱和稱莫逆焉以病卒於官年五十有六圖永
生平以斯道自任精研關洛之學無疾言遽色終日正

大城縣志 卷九
襟危坐若接大賓而胸襟灑落善楷書長於詩古文詞
尤精岐黃術著有史論數十卷卧嘗子二卷後燬於兵
燹惜哉

呂仕發傳

呂仕發字尙猶大城人幼英敏好讀書十八歲入邑庠
受知於邑令謝鍾齡謝福建人名進士也一見刮目送
省中蓮池書院肄業院長張翰林麟甲深器重之嘗立
窗外聽仕發讀書逾子夜不倦語人曰呂尙猶真讀書
人也學遂大進及歸海陽胡文伯延之誨其二子仕發
甫弱冠文伯優禮相待不啻宿儒自河間軍廳及天津

府署前後四任相從胡後陞安徽巡撫邀之去仕發以親老辭後嘗致書問慰三十年如一日在家事母以孝聞事伯父如嚴父所得財物皆付之妻死不再娶母歿哀毀踰禮貧不能葬日夜號泣同邑知威甯州事劉標聞之助金以葬服闋後赴威甯州誓必報之劉不肯勞以庶事惟令教其二孫後代管厰務積千餘金時劉虧欠官帑仕發傾囊助之甫歸而劉被逮死每恨不能救其難作詩二十首哭之其大節慷慨類如此平居持身接物嚴而泰和而節終日無惰容讀書不拘成說而每有精義出人意表文以理法爲主不尙詞華久困場屋

大城縣志 卷九
三
以明經老寡如也晚年好易日夜研究之頗有心得乾隆甲辰八月卒年六十有七著有讀易錄十六卷率真集一卷遊黔中卽非草八卷

贊曰徒步八千里往報威甯州而思濟其難非國士而能若是乎雖其功名著作未顯於世而幽光自不可遏君子人與君子人也

劉雲峯傳

劉雲峯字漢屏號象嵐大城人少孤好學經術湛深制藝喜談古大家乾隆癸卯補博士弟子員學使宮詹金士松器重之家貧親老曲意承歡母歿後餘薄田數十

畝兄多病盡鬻之以供藥餌以舌耕自給家無擔石宴
如也殫心閩洛之學每日所言所行夜間逐一思之一
覺微疵輒終夜不寐教讀垂四十年因人化導鷄鳴而
起燭跋而輟不施夏楚諄諄如家人父子相勸勉弟子
無棄材其擢巍科膺選拔者若王滌源王心一劉保垣
等皆爲名士爲學以慎字爲主兢兢然檢身若不及惟
義之所在則毅然不避激切之譏嘗有句云貴賤窮通
總弗知事關分內便爲之其有定識定力如此子毓瑤
嘉慶甲子舉於鄉選授四川遂甯令就養署中訓子曰
作令亦是切已學問州縣親民須事事體察毋忘民瘼

而負國也毓瑤受命維謹案不留牘野無藏奸遂甯大
治道光壬午孟夏卒於岳池縣署年六十有六例贈文
林郎

王心一傳

王心一字誠齋大城人先德元亮公樂善好施有子五
人先生其季也元亮公卒家遂貧甚先生十四始入塾
讀書過目卽成誦鄉先生劉雲峯李文蔚皆器重之塾
在固獻村距家四里許往來不避雨雪乾隆甲寅河決
初冬水寒冰薄先生每飯後徒跣涉冰赴塾冰刺股血
淋漓不忍令諸兄見師惻然曰勤學如是何患不早成

耶春夏間則與諸兄灌園吟誦不輟如是者八年乙卯
受知於吳公稷堂補弟子員以不克博覽爲憾事厥後
爲經師束脩所入半以市書枕藉其中故經術比於先
儒而謙沖逾於後學尤喜誦性理語錄晝夜危坐脇不
就席文思浩乎沛然一日輒成三四藝嘉慶癸酉中副
車諸前輩皆爲之扼腕先生夷然曰何必爾豈爲科名
始讀書哉與邑諸名士以志節文章相淬厲一時從遊
者前後百餘人多掇巍科爲名儒遠近皆稱誠齋先生
訓子植枌以讀書立志爲先不以科名爲亟宗人或謂
先生老矣而不置生產若之何先生慨然曰吾生平無

長物子豈不知耶焉用此阿堵物爲子若孫養驕氣哉
又謂力學能作進一步想則惟日不足處境能作退一
步想則隨遇而安知交有出仕者屢致書招之或一往
或卒不往蓋其自安淡泊皆自修身俟命中來非驕強
鳴高也日惟以敦倫讀書爲性命從兄文一老而獨貧
無立錫地先生謂諸兄曰我父視兒子猶己子我亦當
視從兄如胞兄今我兄弟有子八人而文一兄無嗣我
父有知其謂之何後當以次子植桂爲之嗣晚年操行
益謹嘗謂人欺我勿使我欺人我容人勿使人容我座
右書曰有容德乃大無欺心自安把卷終日無倦容不

輕假人以辭色而與同志講道則藹若春風或扣以廿一史中事輒背誦不遺一字其天全也道光甲午十一月卒壽六十有二著有花萼堂制藝二卷

贊曰志於道德者功名不足以累其心先生艱苦備嘗而其心不爲利祿動真豪傑士哉彼出其金玉錦繡以取卿相者聞先生之風亦可以幡然改矣

劉保垣傳

劉保垣字少文號薇卿大城人天性孝友貌凝重而內穎悟家世耕讀自前明卽巨富忠厚好善縣令常表其門曰好禮家風至公父冠華公家以屢分而中落遂延

聘名師以訓諸子弟供給豐贍諸子六人皆遊泮公文
法蘇韓字宗顏趙十六歲補博士弟子員次歲卽食餼
甫弱冠應嘉慶癸酉拔萃科得選拔貢生惜殿試邁疾
遂就職直隸州判歸部銓選冠華公歿公哀毀逾恆葬
後家日以替乃授徒於楊柳青暨獨流等處其教學以
勵品砥行爲先爲文以理法清真爲要規法之嚴實近
今所罕有得其薪傳者若靜邑廣西撫軍高公崇基及
津門河南太守高公振瑀大令高公善觀皆公之高足
弟子也其他造就登甲科者不可勝計晚年遊幕巴蜀
著有川行集雜詠一卷又善青烏術著有理氣源流說

長子育純次育芹孫祖侗皆公所自教學博品正蜚聲庠序間公長孫佶督勇河防者五越月事平後口不言功亦可見公之家教矣古稀後乃改就訓導未及選而卒贊曰

南皮張相國序公家乘云劉氏一門多方正績學之士詢不誣也少文公樂育人才根柢忠孝雖潛華隱曜而其弟子皆能爲國宣猷澤及萬姓公之教澤宏遠矣豈第文章書法冠絕一時哉

王植桐傳

王植桐字東廂大城人九歲能屬文從鄉先生劉雲峯

受經道光三年補博士弟子員家甚貧讀書龍泉寺中
夜則拈香而吟晨則抱甕而汲攻苦不輟思致顯揚爲
堂上歡父歿後值大水年饑寒苦愈甚種瓜栽稻爲老
母甘旨計其叔自館歸見其作勞惻然傷之以爲廢讀
而耕也而不知其學乃大進五年館於北曹去家二十
里不能朝夕承歡遂奉母以行以束修備甘旨八年母
歿柴毀骨立葬祭如禮一物也必薦一薦也必誠每出
入必焚香以告終其身如一日焉二親旣歿不復以飢
寒爲慮教從弟翹南馨山讀書刻苦自勵與任杏田張
蠶菴宋鑑塘諸先生以氣節文章相淬勵乙未舉於鄉

其教諸弟不獨培其心性課以詩書並爲之資其家計而禦其外侮乙亥秋翹南中副車己未馨山登賢書始掀髯一笑友教最廣前後從遊者多有造之士顧常歉然於不能取進士出身有所表見於當時九上公車將得復失澹如也咸豐辛亥築故步墅別業誦讀之暇時花種菜聽鳥觀魚翛然有世外想暮齒益邃於經術於四子書尤能發前人所未發出其緒餘以砥勵同人裁成後進師弟朋友間切切惻惻如也子若煦有雋才早卒無子以侄爲嗣遺命以遺產作義田祭田以遺宅作家祠以別墅作家學神明不亂端坐而逝著有四書管

見錄二十卷

王植桂傳

王植桂字馨山大城人副榜植柎之弟也幼穎悟絕倫方五歲時其母問曰讀書須先知孝弟假令兄愛弟弟不敬兄弟敬兄兄不愛弟當如之何公應聲對曰當益加敬愛母大奇之使從兄植柎受業九歲六經已熟十四歲父卒公盡哀盡禮一如成人弱冠補博士弟子員咸豐己未科登賢書庚申會試高薦未中自是名心遂淡因肆力於古博覽羣書注七家詩傳誦海內又工於大小篆手刻陰隲文印章送人以勸善公天性孝友無

間晨昏出入必偕飲食必共兄植柎作墳篋合譜以彰
之一日聞兄病星夜自館歸曰侍湯藥顛於神明兄愈
後復持齋三月鄉里皆歎服一門之內怡怡如也友則
與明經宋紹濂爲道義交以洛閩之學相切劘平舒儒
風蒸蒸日上從公學者多擢巍科以去必以盡倫立品
相勗焉同治九年卒壽五十歲著有詩文稿十卷贊曰
東廂翹南兩先生粹然儒者古道照人公起而參之家
庭之間互相師友極天倫之樂事爲鄉黨之儀型孝子
弟弟聞風而起王氏三珠樹不得專美於前矣圭組之
榮何加焉

鄉獻志

古者制祀典以勞定國以死勤事禦大災捍大患者皆舉於朝朝廷旌其功德及民故祀之昭忠祠復許其本邑祀之於鄉賢祠典極隆也平舒自唐以來祀者十有六人自康熙以後尙闕如也爰依任邱志例凡可入祠而未舉者歸諸鄉獻以俟舉云

鄉獻

唐

董芳爲蜀峨眉令政聲煥然

元

劉寬任平章而無驕亢之意處鄉黨而有仁厚之風駕舟還鄉行李蕭索可以知其介矣

明

王亮官尊方岳素敦冰蘖之操囊罄宦資不足衣棺之費其貧徹骨豈矯飾於身後者哉有傳

傅吉剛直有爲立朝作敢言之氣謨猷克壯匡濟有賜緋之榮

梁材存心制行皆峻偉可法任都憲撫綏有方掌戶曹會計允當有傳

馬慎監督糧儲出納惟允整飭海道攻守有方倭寇潛

形楚民頌德有傳

馬亮雅志清修門無私謁義所當行雖豪強不憚詳山
東通志

王紹博極羣書文根理要經理庶政則剛柔相濟爲府
侯所重

孟錡擷經史之菁擅詞華之美戶曹庶政蝟集處之迎
刃以解

劉鉞大受父任巡檢性資剛毅志趣高明居家則悅親
睦族式彰孝友之風處人則不暴不凌克著直方之
守明農自給訓子有方

李淮松之父任鄆陵主簿才高度雅識敏政優禦巨寇而城賴以全保殘民而士因用奮有傳

王潤嘉靖年貢士任河南府鄧州知州清嚴蒞政孝友傳家緝暴民安鸞鳳與鷹鷂並著愛人濟物春風共化雨同施

劉大受正直立朝銓署風清百辟肅雍典禮容臺月殿一簾應光俎豆以重儀型

王勳萬歷年貢士任真定府臨城縣訓導職僅廣文行高月旦

李應魁兩間正氣一代人文李署祥刑處處陽春有腳

山公啟事澄澄冰鏡無私旬宣績懋青齊謙謹心如
赤子有傳

國朝

薛溥甲申年貢士任湖廣鄖陽府保康縣知縣奉

旨特賜祭葬贈湖廣按察司僉事大義薄雲精忠貫日罵
賊比常山之舌愛民有召杜之美任所賊執抗節不
屈被害

劉漢儒任都察院左副都御史奉

旨特賜祭葬有傳

劉 樞有傳

劉 煦有傳

鄧天一有傳

任聯第有傳

宋紹濂有傳

王植枏有傳

王亮傳

王亮字仲明生有夙慧家極貧性篤孝喜讀書苦無資
斧十二歲有塾師偶與之語愛其慧而授之讀過目輒
記不忘與之講貫莫不洞徹村民皆呼之曰神童於是
聚金助膏火一日按院過境其父當應肩輿適病莫能

興追呼甚急亮代往行至中途按院公忽問夫役中有
王亮者乎答曰有指其騶從曰與騎乘之衆莫解其故
亮怡然騎而前趨至城入察院署先喚王亮問其家世
繼傳縣令語之曰吾途中假寐有神夢王亮貴人也奈
何賤役之詢諸夫役果有其人無論其家貧不能讀書
村塾亦無明師可善視之縣中素無甲科破天荒者必
此人也縣令遂留署讀書補博士弟子員宣德丙午領
鄉薦明年丁未果聯捷成進士此大城縣甲科之始也
授大理寺評事治獄多所平反活人無算擢山東布政
使尋改河南布政使政聲卓著體制尊嚴門無私謁之

人案無私報之信爲官二十餘年家貧如故卒於官衣棺皆不能自備河南紳民公請崇祀名宦祠勘云官尊方岳素敦冰蘖之操囊罄官資不足衣棺之費其貧徹骨如此此豈矯飾於身後者哉

梁材傳

梁材字大用金吾右衛人弘治十二年進士授德清縣知縣勤敏有異政正德間遷刑部主事改御史出爲嘉興知府調杭州田租例參差材爲酌輕重立畫一之法遷浙江右參政進按察使鎮守中官畢眞與宸濠通將舉城應之材與巡撫張縉等劫持眞奪其兵衛尋以憂

去嘉靖初起補雲南土官相仇殺累年材召其酋曰汝
罪當死今貰汝以牛羊贖御史訝其輕材曰如是足矣
急之變生諸酋衷甲待變聞無他乃止厯貴州廣東左
右布政使全官林富家市肉多材召其家人誠之富怒
詬而出材治簿書自如富乃慚謝吏民輸課今自操權
衡吏不得預時天下布政極廉者二人材與姚鏞也拜
右副都御史巡撫江西甫兩月召爲刑部右侍郎尋改
戶部遂代鄒文盛爲尙書自外僚登六卿不滿二載材
以受恩深益盡職上言臣考去年所入止百三十萬兩
而所出至二百四十萬加催徵不前邊費無節凶荒又

多奏免國計安所辦乎詳求弊端一宗藩二武職三冗食四冗費五逋負乞集廷臣計畫條請於是宗藩武職各議上三事其他皆嚴爲節帝悉報可惟武職閒住者議停半俸帝不納經費大省國用以充中官麥福請盡徵牧馬草場租材不可侍郎王軌清勦戚莊田言宜量等級爲限材奏成周班祿有土田祿由田出非常外復有土田今勦戚祿已踰分而陳乞動千萬請申禁之自特賜外量存三之一以供祀事帝命并清已賜者額外侵據悉還之民勢豪家乃不敢妄請乞畿輔屯田御史督理正統間易以僉事權輕屯政日弛材請仍用御史

御史郭弘化言天下土田視初減半宜通行清丈材恐
紛擾請但勅所司清釐籍難稽者始履畝而文帝悉可
之母喪去服除起故官大同巡撫樊繼祖請益軍餉材
言大同歲餉七十七萬有奇例外解發又累萬較昔已
數倍日益月增太倉銀不足供一鎮無論九邊也繼祖
數請不得議開事例下戶兵二部行之時修建兩宮七
陵役京軍七萬郭勛請給月糧冬衣材言非故事如所
請當歲費銀四十五萬且冬衣例取內庫非部事勛怒
劾材誤公帝詰責材竟如勛奏勛復建言三事請開礦
助工餘鹽盡輸邊漕卒得攜貨物材議不盡行勛益怒

材初爲戶部值帝勤政力祛宿弊言每從及是屢忤權倖不得志乃乞改南爲給事中周琬所劾下吏部尙書許讚等請留之帝不悅令與材對狀材引罪得宥而讚等坐奪俸材由此失帝意考尙書六年滿遂令致仕初徽王守莊者與佃人訟材請革守莊者令有司納租於王報可王奏不便帝又從之材已去侍郎唐胄等執初詔帝大怒并責材令以右侍郎閒住而奪胄俸下郎官詔獄明年戶部尙書李廷相罷帝念材廉勤大臣亦多薦者乃召復故官加太子少保三掌國計砥節首公如一日帝眷亦甚厚其秋考察京官特命監之有大獄不

能決又命兼掌刑部事帝歎曰尙書如材者十二人吾無憂天下矣大工頻興役外衛班軍四萬六千人郭勛籍其不至者責輸銀雇役廩食視班軍廷相嘗給之材堅持不與勛劾材帝命補給勛又以軍不足籍逃亡軍布棉折餉銀募工材言今京班軍四萬餘已足用不宜藉口耗國儲帝從其奏勛益怒劾材變亂舊章先是醮壇須龍涎香材不以時進帝銜之遂責材沽名誤事落職閒住歸旋卒年七十一隆慶初贈太子太保諡端肅當嘉靖中歲大臣或附上取寵材獨不撓以是終不容自材去神仙土木事益繁計相取充位國用大窘世宗

乃歎曰材在當不至此

馬慎傳

馬慎字自修龍池其別號也父齡中正德丁卯鄉試任河南永甯令廉而有爲及自修公嘉靖庚子辛丑連發封公已優遊林下矣公性孝甫中進士聞封公有疾堅請歸省公卒服除授戶部主事代州糧儲節積羨金十萬兩悉入內帑下詔褒美之有白金綵幣之賚再督理兵餉恤士卒慎出入士馬騰飽陞大同守值庚戌之變練兵固守民賴以安未幾丁內艱再除登州守兩府俱有宗藩梗沮難治公清正不苟無敢譁者登尤有海防

公以武略著於時內擬邊才陞湖廣按察使司副使整飭淮海道倭寇犯境公統領親兵張祥等援剿親冒矢石經數戰斬獲級百餘顆奪獲盔甲器械船舟有差奪回擄去男婦五百口捷聞事後敘功加陞一級賞銀十兩銓曹方擬柄用值叅將王介乃趙總倖弁仗勢奸猾出征懶情公實申兩院介陰狡捏詞賂謀當路令公回籍聽勘後介恐事白受顯戮服毒而死公得補山西潞安道副使以疾卒於官公忠勇天植居鄉多義讓爲諸生時歲貢已及公念次貢李淮年老讓淮先貢公遂登

科第

李淮傳

李淮字復泉一字峯泉大城人明歲貢生慷慨有大略考授河南鄆陵簿簿無專司同城於令以佐令治不治嘗與令論治曰治貴因俗成俗在於教民化民先於造士英材日盛則德澤愈彰經術就荒則貪妄以進此制治清濁之原也每公暇輒與士談經其論以致用爲要過之士若民率呼先進見者若就傳初不知其官署也嘉靖中土寇猝至城且陷令曰城郭已缺兵甲不多寇深矣若之何淮曰吾以衆志爲城以無懼爲勇遂聚士民激以忠義衆皆踴躍從之整旅而出慷慨誓衆曰爾

等身家我曹大節在此行也奮擊大破之餘賊鳥獸散
脅從者多被控在逮或勸令盡除之淮曰是又速之叛
也稽其鄉貫令甲長鄰右具保狀復詔鄉之紳有權力
者領之遣囚曰此某鄉先生活汝汝再犯則送官戮矣
私謂紳曰樂生惡死賊亦猶人彼亦恐邦族不容故不
安其生理耳恕舊惡必貼然衆心折令亦服會以艱歸
服闋未起其子松繼起仕矣神宗萬厯間松以中丞被
顧問帝曰卿父剛方有節文武兼全能以經術爲治術
朕每惜其未大用也後以子貴贈通議大夫山東按察
司接察使晉資政大夫兵部右侍郎崇祀鄉賢祠

李松傳

李松號小峯邑蘇莊里人鄆陵簿淮子生警悟不羣弱冠補博士弟子員偶小試不利因下帷攻苦歷三冬嘉靖戊午舉於鄉壬戌成進士筮試浙之歸安嚴明清介時巡方使者按浙立清廉貪酷牌四論所考官自審政績立各牌下一時同察者競趨清廉公獨立酷牌下使者驚異詰之公曰職讀聖賢書叨甲第頗知自愛貪則斷不敢爲清廉亦自分未能歸安豪右勢族非嚴弗治酷或有之使者動色稱奇密囑以緝捕毫勢因構禍幾不免謫州判正直之氣不以微官故少貶復陞山左滕

縣繼主工部曹政皆有狀歷任山東按察使僉事備兵甯前丰稜表著威惠並施辛勤十有二載晉秩至布政使司後陞右都御史節鉞遼左三年悉心撫字軍民悅戴後以艱歸里服闋絕意仕進優游林泉與鄉人處恂恂如布衣毫無貴倨氣誠一代間氣人倫楷模大中丞劉公其甥也嘗道其詳因傳記之

李應魁傳

劉漢儒

李應魁安慶屯人字鵬所公兄弟四人公行三生而岐嶷與弟龍所公俱負異材公家世住河畔之賈村公父卽封君名鎧者隱居樂道不求仕進尤精堪輿家言沿

河得地一區云此地鍾氣不凡當有顯者恐無德以當
後見其二子迴出尋常乃移葬其先萬曆壬午龍所公
先得雋至戊子公始登乙榜壬辰成進士人皆服公父
之德之識公初授鳳陽司李執法平允請託不行若大
案若疑獄人棘手莫辨公立剖無留牘政成告最欽擢
吏部歷驗封郎中冰壺玉尺一時咸號知人先是公與
同年友鄧姓同宦中都鄧爲首縣令行事多漫墨公規
正而復保全之故得同入銓曹陽感而陰銜之比得掌
選多方排擯已出公爲廣西兵道矣賴家宰秉公得萊
州道不苛不擾竟以疾卒於任公平生純正無二一本

程朱之學兩兄素赤貧公資糧不時養給終其身足以俯仰弟龍所公亦孤介絕俗仁孝成性壬午中後卽分坊金與兩兄各置田七十畝亦人所難也

劉漢儒傳

劉漢儒大城人明天啟二年進士崇禎時累官至四川巡撫流賊陷夔州圍太平石砭土司秦良玉率兵援之漢儒運長慶米濟其軍太平圍解中書涂原練鄉勇守梁山擊退賊漢儒及巡按御史黨崇雅請用原以蜀人治蜀兵莊烈帝不許并罷漢儒

本朝順治元年五月起授都察院左副都御史九月

世宗章皇帝車駕將至京師羣臣俱赴通州迎漢儒疏言
城守空虛懼奸民竊發請留重臣以鎮中外派守兵以
嚴出入遠偵探以杜窺伺下部知之十一月

賜鞍馬時流賊自太原直犯井陘始開城殺官仍退據固
關漢儒疏言井陘險峻崎嶇一夫當關萬夫莫敵且去
正定近倘賊兵長驅正定無兵可恃今宜飛檄官兵視
賊所向或直搗其巢或分截其路賊可就擒否則我兵
南勦賊已近在肘腋土賊響應首尾兼顧鞭長莫及勿
謂疥癬毋煩過慮下所司知之二年閏六月疏言頃者
南差不用南人乃一時權宜計今天下一統何分南北

嗣後遇巡按差缺除迴避本省外酌量隔省資才堪任者列名奏請

簡用得

旨各省巡按南北一體差用但家鄉鄰近者雖隔省亦不得差是月

賜紗蟒衣一襲七月疏言十三道御史原百有二十用以巡方糾察我

朝酌減至六十今差務日繁銓部竟未考滿何以應差請勅部速補

詔如所請八月御史王守履劾漢儒係大學士馮銓黨爲

御史江禹緒營求招撫鄖陽漢儒具疏辨並引病求罷
得

旨劉漢儒無端被誣著益盡心職掌以振風紀三年復以
病乞休康熙四年卒

賜祭葬如例

劉樾傳

劉樾直隸大城人順治三年進士

特簡新進士十人分用六科遂授樾戶部給事中疏言頃
見撫按參劾嚴小吏而寬大員非有司多不肖而道府
多賢也勢位漸崇情面難破卽如青州道韓昭宣受賂

縱釋叛賊多至十四人巡撫楊聲遠議令住俸剿賊罰不蔽辜請下部飭究昭宣坐褫責四年轉兵科給事中
以泰州遊擊潘廷吉棄城遁劾江南巡撫宋調元濫舉失當調元亦坐革職是年樾循大計拾遺例揭山東聊城知縣張守廉贓欸吏部奏令所司勘議以守廉失察吏役罰俸三月樾誣贓坐革職十年正月吏科都給中
中魏象樞疏請舉行大計拾遺例且言順治四年

上未親政科臣劉捷給拾坐誣褫革於法未爲平允得

旨糾拾反坐言官壞吏治塞言路以後科道糾拾官卽準
大計例議處如科道挾私妄行許吏部都察院指實叅

奏又

諭曰吏役詐贓知縣前無覺察僅議罰俸言官反議革職
劉健明有冤抑其令吏部查奏上

命以原官起用六月授兵科給事中十年充福建副考官
十一年五月疏言近畿水澇之後地畝可耕方春農事
尤急請

勅撫臣檄州縣於存留銀內酌借災黎以備籽種俟秋成
後照數償官仍飭親履鄉村察核不使假手吏胥俾民
得沾實惠十二年五月因復設巡按御史條上四事一
舉劾無循虛名宜進惻愍吏而抑巧官一禁交納以清

賄賂之原一提問無致稽遲貽累一慎關防無使幕役
叢弊疏皆下部院行之是月疏言海賊鄭成功蹂躪漳
泉窺伺省會臣前奉使入閩詢悉地勢福清之鎮東衛
明時曾駐兵防倭倘復舊制可以保障長樂可以藩衛
會城又宋元以來設州治於海壇島明初以倭患棄之
若設將鎮守可與鎮東互爲犄角仙霞嶺乃八閩門戶
與江西浙江接壤易於藏奸宜設官控制招民以實其
地使賊無隙可乘又海賊數犯京口皆泊舟平洋沙若
乘賊未至移官兵駐鎮其地賊旣退無可據必不敢深
入內地疏下各督撫酌議以海賊分道入寇請

勅鎮海將軍石廷柱等驅巢後分別駐守十三年授山西河東道十五年轉河南鹽驛道明年遷湖廣按察使尋擢本省布政使十八年總督張長庚巡撫楊茂勳交章荐其操守廉潔才識精詳協濟滇黔兵餉至八百餘萬并清逋賦墾荒地及除鼓鑄積弊數事疏下部院會捷丁母憂回籍康熙二年服闋補江西布政使十四年內陞太常寺卿十六年遷大理寺卿明年三月遷副都御史五月疏言自吳逆叛亂軍需旁午大計暫停恐法紀久弛人情易玩今大兵所至漸次蕩平直省督撫絕無舉劾多以軍需未竣爲辭伏思兵燹之後殘壞已極正

賴賢有司招徠安輯潔已奉公若使不肖者滋擾何以
登吏治奠民生息盜賊請令督撫速行舉劾凡經保舉
各官或改行易操一體嚴察不得徧徇干咎

上是其言下部如所請行六月因病乞休

溫旨慰留之

遣太醫診視七月遷吏部右侍郎十二月擢刑部尙書明
年四月病劇再疏乞休

允回籍調理五月卒於家得

旨劉棐宣力有年勤勞素著下部議卹

賜祭葬如典禮諡端敏

劉煦傳

鄧毓怡 邑人

劉煦字春甫大城人生有異秉幼受業於同邑解元王公滌源精研銳學弱冠補博士弟子員試輒冠軍道光戊子科登賢書欲以科第顯其親王公官於浙又師事孝廉劉公毓瑤文益精行益粹門下士日益衆石樹珠登進士公獨困於春闈屢薦不獲售道光甲辰 恩科大挑二等銓授甯津縣教諭以母氏春秋高遂乞終養養親之暇樂善不倦見義必爲恤孤嫠捨棺木防河築堤歲施芻茭數十萬振拔孤寒之士飲食之教誨之成就者數百人咸豐初大水凶饑竭粟贍民全活無算公

力足以治繁劇神足以周細微以至誠相與以好施爲樂雖遇橫逆胥以和悅處之未嘗與之較也數百里內咸稱善人同治癸亥坐補原缺甯邑人士素聞公名皆執贄請見一覲容貌心醉神融碩師揭領於上時彥曳裾於下談道義論文章彬彬如也未及期年士氣大振講書闡發聖訓深切著明粲然成文辭音節抑揚合度聽者莫不竦服課文一字不安必加改削日不足繼之以燭雞鳴復興了無倦色修學宮葺宮牆造祭器煥然一新有涉訟求關說者必勤勤勸止之其冬與邑令彭載恩禦宋景思之亂獎六品頂戴秩未半以年老罷官

解組時並除後任交代之累甯邑之士如失慈父母焉
經指授者王淑身劉心符等皆登賢書歸里後主講文
安廣陵書院造士之心老而彌篤雖卧病呻吟未嘗輟
也公踐道學之實而不居道學之名嘗曰讀聖賢書但
當身體力行不當分門別戶凡有所爭皆客氣也又訓
子孫曰讀書則人敬之爲善則鬼神敬之論文則曰言
有序言有物邑侯彭公瑞麒敬禮甚至每致書咨詢必
有所廣益同治癸酉十月卒壽八十有二 誥封奉直
大夫著有德馨堂詩文集贊曰

公與杏田任公同師以明道經世之學相砥礪門下士

各數百人有誨人不倦之風任公終老明經未得見諸政事公雖小試胸中所蘊不過百之一耳獨樂育英才儒風丕振至今不衰猗與盛哉

鄧天一傳

鄧天一字以清大城人太學生長身玉立性孝友篤信勤學樂善好施家本巨富凡族人之貧乏者教養婚葬按月給以錢米立義塾以育英才修家祠以昭祖德出腴田二十頃以贍族人一切錢糧皆公任之至親友之貧乏者竭力周之俾各得其所此公之大略也而助餉之事爲尤偉咸豐四年正月初九日粵逆林鳳翔李開

方等由天津靜海縣潰圍南竄忠親王帥師追之至白楊橋日已夕矣輜重未至大軍皆飢公亟出米六千餘石餉軍忠親王大悅士飽馬騰遂殺賊無算大軍至舒城命公運礮督辦糧臺事務後破連鎮粵逆蕩平忠親王欲保公以二品頂戴按察使銜分省候補道公固辭曰某爲國非爲身也忠親王固舉之不得已受州同銜後忠親王防護海口公又助大樹二千株助餉三千二百金蓋公視國事如家事焉同治戊辰馬賊蹂躪畿南公籌辦團練修土堡分方固守一方賴之南路廳蕭公送急公好義匾額以彰其義又出資助修鳳臺書院文

廟城池橋梁堤岸河工立粥廠勸捐穀施棺木捨藥材
五十餘年未嘗少懈同治十年大饑流離滿目公費錢
萬餘緡糴米爲乾餼以食饑民全活無算家以中落怡
然不悔也公父早歿事繼母甚孝公弟兵部郎中天符
官京師僧恭人在都門就養得疾公聞之冒雨涉水步
行三晝夜達京師延醫調治月餘始愈公不自知足之
腫痛也光緒七年天符授湖南沅州府知府公垂涕戒
之曰我鄧氏自前明出仕者多矣皆以清廉爲本弟其
慎之幸勿貽先人羞也天符恪遵公命卓卓有政聲公
以光緒十年卒壽七十三歲 誥封中憲大夫著有讀

史錄八卷天符自有傳贊曰

昔漢武時卜式以家財助軍賜爵關內侯漢史稱之范
文正公立義莊贍其族宋史稱之今鄧公爲國竭忠以
金粟餉三軍而賢王成厥勳居鄉好義以乾餼食萬民
而闔邑無饑人卜范二公未能或之先也而孝友睦婣
又如此謂非今之古人哉是宜登諸國史不第爲邑乘
光也

任聯第傳

任聯第字杏田大城人幼聰穎志意恢廣受業於解元
王公滌源王公大器之授以心法弱冠補博士弟子員

屢試高等蚤食廩餼蜚聲黌序間公治經具卓識窺奧
義嘗謂讀古人書於古人之一言一行必設身處地證
以己之言行則是非臧否立辨於己自有裨益爲文須
於無字句處尋覓則實理虛神畢現落筆自迴不猶人
及門得其指授春秋兩闈獲售者踵相接也公一生志
願在於振作文風扶持名教凡關一邑風化之事必以
身肩之任勞任怨皆所不辭邑素無書院公深以爲憾
邑北沿莊有河灘間田數十頃民佔種百餘年同治丁
卯公倡議報部升科以其租入創立書院請於邑侯彭
公瑞麒彭公義之立爲具文詳憲奏請升科遂建鳳臺

書院定規條籌膏火延名師立齋長士得肄業其中由是登賢書貢玉堂者蒸蒸日上又邑有節孝祠圯已久矣祀典寢廢公慨然曰節孝名教所關廢而不舉何以型民遂糾合邑紳募資重建落成公手撰楹聯曰三十載完貞有孝子賢孫方能到此地位二八月大祭仰冰心柏操自應薦以馨香此皆公之義舉大有裨於一邑者也是以彭公贈聯云肇修鳳院育人才振一邑文風匡予不逮崇建鴻祠旌節孝隆千秋祀典彰厥有常至其授生徒也教育之殷栽培之篤尤不待言遠近仰之如太山北斗自治舉業數十年其文雅健雄深有國初

諸老風力卒不得志於有司以明經老士林惜之或曰天生公以裁成後進也使早登仕版吾鄉後進尙得被其雨化哉論者以爲知言同治十一年卒壽七十有四著有四箴堂稿門下士劉淮年梓而行之贊曰

書院係闔邑之文明節孝關盛朝之風化重修尙易創始維艱非有大力孰能肩其任者公以一明經經營數十年竟成盛舉洵有功名教矣豈徒經術湛深爲北學巨擘哉

宋紹濂傳

宋紹濂字鑑塘大城人世居邑南周家莊生有至性幼

喪母哀毀如成人事繼母以孝聞弱冠後卽有志於聖道孝友篤行身體力行尋補博士弟子員試輒冠軍食餼從堂伯母馬氏自十九歲守義擇先生爲嗣節母老病先生侍湯藥如侍本生母父秉衡公卒毀幾滅性寢苦枕塊者三年鄉鄰聞其哭皆悲不自持除喪後每日早暮必焚香於主前竭誠盡敬雖恩遽不敢廢性極方嚴動作必以禮望而知爲有道者學以躬行爲主不屑屑於章句間從游者日衆始皆憚其嚴峻久之則樂其循循善誘過相規善相勸噓枯吹寂和若春風讀書有卓識於宋元明

國朝先儒語錄皆窺其蘊奧而判其純疵其自信者則在據平湖以溯孟津由孟津以溯閩洛不旁涉於支流於金溪姚江尤杜之不遺餘力中年作日記時時省察或偶有不慊於心則喟然歎曰吾不得入於聖賢之域矣爲文不尙詞華期於古作者咸豐戊午科鄉試房考趙內翰樹吉得其文大稱賞卓荐不售歎惋者久之先生樂道人善遇忠孝節義事力表揚之詩歌傳記相繼而作讀者皆感動奮發惟嫉俗如讐每酒酣目上視氣勃勃不可遏因學琴於煮石山人以當佩韋之意有暇卽垂簾鼓琴風韻清遠穆如也家甚貧惟富於書籍出嗣

後無田可耕其兄楚望公承先人志析本產之半以與之辭不獲命受三分之一因推敬兄之意以敬姊周恤終其身其姊夫王嶽生宿儒也先生曾師事焉並代籌其生計曲盡就養無方之誼家政以孫夏峯先生爲宗法庭幃之際肅如朝廷友皆道義交門無雜賓於書無不讀尤精醫理嘗曰醫術也當以道行之治疾不擇貧富不受謝同治元年授恩貢生學益純德益進知行皆合於一明年正月丁繼母憂以哀毀致疾卒遺命以衰服歛年四十有九士林哭之皆失聲著有四書一得錄孝友堂詩文集若干卷述曰平舒雖蕞爾名臣則有若

梁司徒材李司馬松劉司寇樾皆彪炳於汗青至本正學爲眞儒則自鑑塘先生始使天假之年所造正未可量不幸中道摧折悲夫邑人士幸謹守其遺文以俟續北學編者

王植枏傳

王植枏字翹南誠齋先生長子也幼卽端凝英敏數歲讀忠孝經卽知大義事父母孺慕有加焉父疾侍湯藥日夜不解衣父沒哀毀骨立事母愈謹從從兄東廂先生讀書潛心於濂洛關閩之學以不欺爲主身體而力行之學大進而不應試道光己亥補博士弟子員秋試

中副榜奉母家居讀書自樂時年甫二十三歲或勸之
仕先生笑曰功名最累人學業吾豈爲所累哉雖千金
之貴不易我一日之養也母病焚香籲天乞以身代母
歿哭泣過哀因致目疾嗣後名心遂淡愈肆力於古館
穀所入半以周急半以購書積書數萬卷與其弟馨山
沈酣其中咸豐己未馨山先生舉於鄉友愛甚篤食必
同味行必相攜鄉里化之皆取法焉自奉甚儉而見義
必爲歲饑傾貲以濟之戚友貧不能葬者竭力以助之
無吝心亦無德色所交者任杏田宋鑑塘先生以正學
相砥礪鑑塘遵程朱之說先知後行先生兼取象山陽

明之說知行合一爭論異同各不相下相說以解則愈益發舒善爲歌詩古文遇忠孝節義諸事必作傳誌以傳其人尤善排難解紛親友有爭訟者必勸之息訟而後已此盛德事不可枚舉也邑有李先生文蔚者先生先德常從之遊李沒無嗣先生祀之於家四時祭焉每祭其先必謂子弟曰爲人子孫須爲祖宗所樂有之子孫爲人祖父須爲子孫所樂道之祖父吾先人積德累世始有今日汝曹須培植後人方不愧讀書之士耳嘗取先儒語錄參以已見作日記謂子夢松曰此汝曹修己爲人之則也守時文以博科第何益於身心哉先生

長身玉立容儀溫偉爲邑眞儒門下士多擢高第而獨
以天爵終其身壽六十有五著有十笏草堂詩文集暨
日記若干卷贊曰

不自欺者自修之首也意誠而後心正心正而後身修
先生得力實在於此洛閩之學舉世所宗象山姚江實
可補其偏而救其弊守門戶者力詆陸王豈通論哉乃
知先生之所見遠也噫微斯人吾誰與歸

高義志

高義之人尚矣哉世之知有己而不知有人者皆此
自利之一念誤之也不能濟鄉里焉能濟國家平舒
地近邦畿每多仗義之士其誼可以薄雲天其氣可
以貫金石凡爲國助資兄弟讓產朋友通財及至
性過人者皆載焉洵轉移風化之一助也

呂永祚傳

呂永祚大城趙莊人弱冠爲諸生攻舉業有聲性倜儻
尚義早孤提攜幼弟教養猶子友愛誠篤兼睦嫻任恤
惠洽鄉閭遠近交稱之明季多土寇千百爲羣所過屠

戮焰甚虐俄河間賊至艾辛莊去趙莊六里居人震駭
思竄公奮然曰無恐賊雖悍彼既能統帥多人必非懵
然無知者子當說令去乃偕同里王生往詣賊王生一
言忤賊賊立殺之公顏色不變乃從容正詞曰爾欲行
其志耶慎勿犯吾莊大城順天屬邑也爾不聞趙燧等
之縱橫文霸卒遭翦夷乎賊笑曰爾腹便便何所有公
曰方飽飯爾賊曰爾乃滿腹經綸遂引去鄰村曹家寺
爲徐定國莊富且強賊至每殲之賊積忿約大股長圍
將屠之公偶過其處賊一矢中其股公勵聲曰我呂永
祚也與爾何仇賊目素聞其賢急至前謝罪跪敷瘡藥

取射者殺之以謝天崇之際亂日甚遂不赴棘園逮

國朝定鼎而年已耄矣熊伯龍文稿出公與從兄傑分
讀閱日背誦各不遺一字傑亦諸生也耄而好學智慧
不減於年少迄今里人猶樂述之贊曰

前明山右有蕭欒先牛者遇虎不傷遇賊不害匪名之
服服其德也君殆其流亞與平生孝友忠信之實必有
孚及頑梗者論者徒羨其不畏強禦而善爲說辭抑末
矣

王偉傳

王偉字輔君大城孝業里人父士晉邑庠生生六子偉

與仲兄儀孿生天性孝友讀書不甚慧誦四子書畢父
卽使之學賈身雖居市廛而心好讀書每見先正格言
必身體而力行之嘗讀論語至孝哉閔子騫喟然歎曰
人子當如是也父在時已令其兄弟分居及父歿偉質
易京師以數年所獲金盡以分諸兄弟旣又念長兄而
外皆爲布衣深有愧於先人遂歸與兄弟約復合爨以
家計爲己任視仲兄儀魁梧有勇力勸令肄武儀每習
騎射偉必小心隨侍勤逾僕隸如是者四年儀遂於康
熙戊子己丑科聯捷成武進士少弟任亦入武庠偉欣
然曰吾兄弟皆成名庶可仰對先人矣其爲賈也公平

直正毫不妄取邑進士劉標爲縣令聘使經理倉務偉
悉革陋規百姓悅服大助官聲及歸里年已七十矣居
常三復不矜細行終累大德故遇事而持之以慎每與
後生言余一生未嘗有放心之處處小事如臨大敵最
慕韓魏公之爲人嘗言使魏公如在余必師事之以孝
弟忠信勤慎和緩親賢取友立爲規條以省其身服膺
弗失又自輯問心書一卷深有味於天心仁愛逆境成
人二語一篇之中三致意焉蓋其得力在此也人無賢
愚皆接以和清濁無所失平舒廣文李豐在樂與之遊
嘗曰王君信好前言往訓誠當代之典型不徒爲一鄉

一國之善士也無棣齊公家曰王君容貌辭氣藹然有
儒者風家徒四壁立而夫婦泊然自守樂而忘飢非有
得於道能如是乎其見賞於識者如此公以康熙庚戌
生乾隆乙亥卒壽八十有六公無子人皆惜之贊曰

父在同居父歿則分爨自古已然從未有父分而子合
者今獨於君輔見之且事兄如父又能助之成名以振
家聲洵不負其孝友之志矣至於言坊行表賢士大夫
所不及也賈人云乎哉

張創基傳

張創基大城縣北思河村人也生而孝友性誠篤及長

慷慨好義乾隆中父歿家貧公與兄四人同居田數畝屋數椽四壁蕭然處之晏如也諸兄弟食指繁謀析產公從之逾十餘年公獨置田十餘頃而諸兄窮乏猶昔公言於諸兄曰兄皆不給弟何忍獨溫飽乃復與諸兄合居尋以所置良沃瓜分焉鄉里咸義之凡有爭訟他人不能排解者公至輒息里中無賴子見公皆斂迹屏息如子弟對父兄其正直格人如此公一生篤友于睦鄉里施與慷慨無吝色晚年愈康強暨配劉氏俱以遐齡考終贊曰

讓產於兄美德也以己之產分贈諸兄非友愛無間者

不能也擬諸許武何多讓焉

王思明傳

王思明大城人太學生性仁厚救災恤乏聲動遐邇邑侯王績贈匾額曰善行可嘉

王秉端傳

王秉端字方侯大城庠生也弟秉錄字詮序歲貢生兄弟賦性端方並敦友愛年至八十餘猶飲食必共朝夕與俱天顯之懷無間嬰孺更揮霍好施與閩邑贈匾曰椿津遺風

王有訓傳

王有訓字銘言大城人邑庠生也以命自安而見義必爲官民並欽其義乾隆中邑侯謝鍾齡贈匾曰岳峙淵渟教諭張世端訓導李逢年贈匾曰忠信篤敬典史紀仕許贈匾曰盛德大度闔邑紳民贈匾曰學行兼優

鄧延齡傳

鄧延齡字南星大城人乾隆中賈於京師一日在前門見一米賈扭結一總角書生勢將用武延齡問之賈曰渠家欠余米價錢六百緡悍不還今非全償不可延齡曰吾代償之何如賈曰幸甚延齡卽如數償之亦不留姓名而行書生歸奔告其母母驚曰此義士不可不物

色之書生日求諸市越三日始見延齡邀至其家欲認爲親串延齡不可曰排難解紛丈夫本色非市德望報也如不得已請約爲兄弟可乎遂與書生結交而去後書生成名官黃村同知邀延齡至署敬禮甚至一時義聲振畿輔云

劉彬傳

劉彬字文質大城人太學生性豪邁勇於好義凡有當爲之事莫不慷慨任之事親孝定省無虧兄芳早歿事孀嫂如母爲之請旌初嗜書籍因鮮兄弟廢讀而耕遂以農業起家焉雖家道豐隆終以未得讀書爲憾生子

六人延名師課之不惜鉅費子翰培翰狎入國學翰符
翰城翰雲翰屏皆補博士弟子員教子義方有燕山之
風焉至鄉黨戚好有貧不能葬者出貲助之葬貧不能
娶者分財使之娶鄰村楊姓者夫妻以貧困將離散公
聞之貸以金夫妻得完聚里有爭訟必解其紛其尤無
狀者必勵詞詰責勢若霆摧而理如的破悍夫皆神沮
而退後亦無怨言道光三年大水鄉鄰日不舉火公蓄
積尙多乃慨然分粟賙之免於流亡者無算咸豐三年
秋粵逆俶擾公倡舉團練謂鄉人曰當國家有事之秋
凡我民皆宜稱力以報是歲大饑復發粟濟鄉閭置器

械四方難民來投者踵至公悉定其居濟其飲食四年正月大雪後粵逆南竄猝至公里欲盡挾丁壯以行民皆股栗公知寡不敵衆卽身入賊營見逆首李開方曰村民惟怯不任干戈挈行則靡餉有損於軍費臨陣則逋逃無助於戰鬪況此冰天雪窖迎風卽僵耳何益之有哉侃侃而談了無懼色逆首重公膽義遂舍之去闔村得無恙至同治十年大水無麥無禾人將相食歲暮公又出麥若干以資鄉鄰度歲至於樂善好施救苦扶危善事種種不可枚舉光緒九年卒壽八十有九公卒後幼子翰屏舉甲午科孝廉贈文林郎人以爲厚德之

報云贊曰

公魁梧奇偉飲酒至石許無醉容人有急難傾囊贈之無吝色彼剝成家者聞公慷慨之風亦可以幡然悟矣歿受榮封也宜哉

張桂廷傳

張桂廷大城孫良村人生於嘉慶八年幼卽心懷大志欲以科第起家以累於家務不獲讀書納粟爲太學生血性仁孝剛直天成濟人利物紕邪崇正有卓絕一世之概家雖不富遇困苦者傾囊周之無吝色創立義塾凡有才者無論束修多寡皆涵育陶成之族孫國英衣

食不能給何暇計及功名賴公竭力助之得中武孝廉公有胞姊孀居貧難度日公供養不怠得以苦節終其天年村中素日善者少而不善者多聞公高誼皆化爲善良迨公末年左右鄰村亦薰其德而化矣平生善行更僕難數享壽八十歲無疾而終長子連科次子連甲兄弟同榜中式武闈人以爲厚德之報云

竇淦傳

竇淦字致祥大城人太學生也性倜儻多偉略輕財好施凡邑中有善舉輒欣然樂成之勞心費財皆所不計邑東沿河有堤爲一方保障每當秋水時至勢不能容

公倡衆修之久而不怠屹若崇墉水雖大漲而卒以不
潰民免爲魚乃羣然頌之曰大堤之成非竇公之力不
及此此德何日忘哉又道光十四年甲午秋九月有保
定府束鹿縣販裘褐估客數十人將赴大城廟會客船
失風衣包皆沈於水公急募人拯其溺延至其家飲之
食之亟出黃米麵數十石爲之治乾皮貨不誤其廟會
之期諸客感恩次骨乙未仲秋同祈東閣大學士潘公
世恩書博濟高風匾額懸諸其門此其大略也公子峩
山中道光己卯科武孝廉人以爲厚德之報云贊曰
博施濟衆自古爲難而公獨勇往如是蓋仁人君子一

視同仁不自知惻怛至此極也克昌厥後宜哉

王文瀚傳

王文瀚字穎川大城人太學生也性情慷爽正直無私有幹略居鄉善排難解紛爲人謀無不忠視人事如己事邑中建立書院修堤濬渠一切公務邑侯無不聘爲董事領袖指揮裕如咸稱厥任咸豐中協力捕蝗南路府憲費公賜匾曰協護田穉光緒中卒壽七十歲子淑棠庠生也哭父哀毀逾月而卒

劉慶藜傳

劉慶藜字乙然大城人貤封奉政大夫蕙公之孫也幼

喪父哀毀如成人弱冠卽補博士弟子員次歲食餼因以廩貢捐校官道光中補延慶州訓導罷職歸里咸豐三年粵逆倣擾畿輔騷動公乃率族人鄉鄰等團練製備鎗礮旗幟器械朝夕操演是年大水及冬令人駕小船數隻晝夜來往不歇使水不凍惟一處稍狹可通出入入者必訊問明白方許進村適值南路刑錢府朝儀李公來里查勘縣令曾公貫之亦至夜間忽土匪數千圍村大呼勢甚猖獗公戒鄉人毋動俟其臨近以礮擊之時村中雞犬無聲土匪不知水之淺深亦莫敢進俄而礮聲雷發賊衆驚潰次日公隨同府縣勦拏土匪獲

賊三名訊明後卽正法示衆由是稍定後臘月初六夜土匪又磨至猖獗尤甚公悉力防禦開礮擊之又遁去四年正月初九日髮逆由王口順河南竄去村七八里賊竟未至僧親王困賊於束城鎮公率勇送草料數十車親王大悅賊平後以功授知縣歸部選用並賞加通判銜乃選得河南鄆城縣知縣未到任而丁內艱服將闋而疾卒年方強仕耳天如假之以年豈不大展其經濟乎素抱忠義未竟所施殊令人歎惜不置也

李敏達傳

舉人

姚曰焜

青邑人

李敏達字明軒大城人族居黑龍港河東王家莊少時

仁孝友愛鄉里皆稱之及壯急公好義一切救災捍患
排難解紛諸善行更僕莫數惟倡築河堤一舉爲尤偉
青大交界在黑龍港下游堤勢平行每當河水盛漲水
患頻仍公乃蒿目時艱爰於春際大置牛酒邀集六十
四村士民倡義築堤加高培厚功告竣公欣然曰可以
無患矣又恐患出不虞秋水時至仍會同各村赴堤看
守晝夜傳籤公躬親巡警晝不甘食夜不安席如有口
糧不給者皆公自任之歷五六年無少懈同治五年
秋水漲發將與堤平青邑令彥三劉公目覩水勢洶湧
欲速出票齊集民夫以防河決吏稟曰若請大邑李公

至可無庸出票矣令卽差人持帖請之公至傳帖於四鄉民夫麇至修築防護三十餘日而水勢殺矣縣令謂吏曰河所以不決者李公之力也吾欲榜其門以彰其德子盍爲我言之吏與公言公堅辭不受也迨二三月後劉公榮任天津事亦遂寢核其實數十年無水患者公之功誠不可沒云

張瑞雲傳

張瑞雲字芝輝大城人天性孝友忠厚循謹四歲失怙節母魏氏撫之八歲入塾每以母之憂喜爲憂喜十一歲祖母卒哭盡哀如成人旣長樂行善事親族乞假無

不應其舅好賭傾家公隨時調恤冬裘夏葛供給終身
舅之子亦賴撫養兼爲之營產娶妻道光三十年爲繼
母請旌送祠皆獨力任之不以累其兄也咸豐辛亥四
月夜有無賴子數輩叩門曰有餓莩在爾田爾與吾錢
吾爲爾移置他處公曰此天禍我也何容嫁禍他人親
往驗之見一丐赤身僵卧體尙溫公以手閉其口鼻移
時動轉無賴輩卽散去丐哭曰無衣蔽體不能登門乞
食被伊輩誑來以圖訛索公聞之毫無怒色遂解衣衣
之遣之去咸豐辛酉旱災大疫公出粟十石濟鄉里之
貧者盡付村董初不問何人負債也是年買其堂弟采

雲宅仍令居之同治壬戌又買其堂姪鴻昇宅代爲買宅一區始移居焉同治六年馬賊過境公捐金助邑侯彭公築城是秋歉收又出錢四十緡濟鄉人同治八年族有鬻田葬者公多與其直以助之是年又捐金助建節孝祠凡遇親鄰借貸無吝色無德色亦不書券生平謙退遜讓鄉里稱其有犯而不校之風焉同治十一年卒年五十七卒後四年長子鴻藻舉於鄉劉鑾坡先生大書百忍題名爲賀卽以彰公厚德之報也贊曰

公推祖宗之心以贍族推惻怛之心以濟人有施不求報有求無弗應誠忠厚長者哉克昌厥後固其宜也

陳兆基傳

陳兆基字固堂廣安鎮人天性豪邁輕財重義喜報施好任俠每爲鄉里排難解紛素性然也初應武童試未就因團練功得獎布政司理問銜咨部同治初元莠民思亂有巨盜傅大椿率羣盜以廣安鎮爲逋逃藪吏莫敢犯民不聊生公慨然捐資募死士多人自行倡率斬獲賊首數名賊徒解散復重懲其強梗者以故盜賊之區條成仁里同治五年九月間餘孽又邀河間正村之巨盜張三羣率賊數十昏夜劫公村外誓將報仇公示以大義羣賊驚服叩謝而去十一年河決村南有九里

堤可防南水至水透堤根勢將潰決邑西南一帶村莊
驚慌無措公急出資僱夫晝夜督令杜築四十餘日遠
近賴以安堵耗財五千餘緡絕不言功嗣值歲凶糧價
騰貴公出糧百餘石以分食餓者全活貧民無數頌聲
遍鄉黨乃公送匾額曰恩周閭里前邑侯春圃彭公亦
旌其門曰急公好義公事父母以孝聞兄弟四人公最
幼終身不言分爨女四人而乏嗣有勸其納妾者曰是
何言也有姪可以承嗣猶子非子也耶贊曰

弭盜義也禦水賑饑仁也家庭之內又孝弟如是公眞
偉丈夫哉使見用於世必爲名將也夫

李萬聲傳

李萬聲大城邑南賈村人鄉里皆稱忠厚長者樂善好施出於天性公無子以從孫昇泰爲嗣昇泰持家有術遂富甲一邑公忻然曰吾常恨家貧力不從心未能普濟鄉鄰今庶可行吾意矣光緒十六年大水公出粟以賑鄰里全活數千人十八年荐饑公出麥數百石以賑之十賈村中歡聲雷動全送德周梓里匾額公又立養蒙義塾以成就人才凡邑中善舉罔不爲之倡首橋梁義渡皆竭力資助焉二十二年公寢疾時正修宣聖城隍諸廟公召昇泰至榻前囑曰此事吾不及觀成爾宜

出重資施助方不負吾之志言訖而卒壽八十八歲贊

曰

常人愈富而愈嗇惟恐窮乏者得我公獨以博施濟衆
爲心豈不超出尋常萬萬哉卒之獲奇福享遐齡子孫
昌熾蜚聲疊序天福善人固不爽也

文苑志

文以載道非細故也扶持正學鼓吹風雅自古重之
後世多以科名累其心帖括之外無所用其力不亦
誤乎平舒風氣近古有志之士多能以文章爲名世
之業故凡富於書卷長於詞章工於吟嘯者皆著之
邑乘以爲雅頌之先聲云爾

王延名傳

王延名字文岳大城人邑進士開化令公任姪也天才
豪邁放達不羈少負奇氣又善鯨飲盛年治舉子業不
屑爲勦襲雷同之調湛深經術規模大家以期一當以

數奇連不得志於有司又以其叔父沈寃未雪憤不欲
生仗一劍走吳越間坎壈幾瀕於死而其胸中浩落之
奇曾不以此自抑素長於詩既遭家難後益淋漓悲壯
不懈而及於古嘗至大梁與雪苑諸名士更唱迭和極
一時之盛又嘗館京師顧文起大宗伯家因與楚黃詩
人張石虹訂文字交海內名流咸推轂焉年踰知命僅
以明經舉中復顛躓衣食不給而義命自安聲出金石
垂老無間昔人云詩窮而後工信不虛也王氏素與劉
公愚大司寇爲姻婭延名醉後嘗遊雙鶴堂中與其子
姪性懽愜慙恠憲等相過從篇什甚多復贊修邑志與

有力焉康熙中卒著有南村草堂詩集五卷禮部尙書
許汝霖爲之序

王滌源傳

王滌源字蓮舫大城人天才秀拔經史淹通爲文自班
馬韓歐以迄前明國初大家之文無不含咀英華而得
其神髓道光壬午科北闈鄉試遂弁冕羣英元墨精堅
傳誦海內屢試春闈不獲售歲乙未以國史館謄錄議
敘選授浙江金華府湯溪縣知縣抵任之歲湯溪大旱
公講求荒政行以實心實力存活甚眾再任紹興府蕭
山縣縣西南七十里有龍門山兩峯對峙上有龍湫每

天旱公必齋戒徒跣詣山禱雨雨輒大霈民賴以蘇一
年蕭山凶饑造賑濟戶口清冊請於府吏以虛數進公
斥之曰是欺也烏乎可命以實數進冊至府駁其半賴
闔邑賑局代公墊辦始得蕝事然亦可見不欺之學矣
浙江鄉試入簾爲同考官得士極盛公造士有方根柢
忠孝身體力行門下士劉煦任杏田等經公教育皆爲
名儒子曾樾道光甲午科舉人歷官江蘇候補道家棣
道光乙未科舉人官萬安縣知縣咸豐初卒壽七十三
歲誥封中憲大夫著有義獻堂詩文稿贊曰

公文章獨步當時有海涵地負之概獨政事不少概見

蓋行迹無存故也然卽禱雨一事觀之徒跣登山往返百四十里非至誠動天能忘身爲民請命乎嗚呼長吏愛民如此可以不朽矣

劉淮年傳

劉淮年字樹君大城人性穎異髫年讀書一覽成誦父毓瑤官四川石泉縣知縣道光戊子卒於官扶柩歸里時年七歲從母元氏讀書遇有呵譴輒長跪泣受教戚黨咸異之長從任杏田明經受業年十八補博士弟子員食廩餼連年值水患家益落二十一歲就館保陽藉脩脯供甘旨歲己酉登拔萃科咸豐甲寅奉參贊大臣

僧親王檄派營務處差遣乙卯粵逆李開方等就擒以
軍功選授保定府完縣教諭己未庚申聯捷成進士授
翰林院庶吉士同治壬戌散館授編修四年乙丑科會
試充同考官得士十七人館選者七旋奉旨記名以御
史用五年四月大考前列升侍講八年正月轉補侍讀
二月京察一等奉旨記名以道府用九月初七授廣東
惠州府知府九年三月到任捐輸黔餉賞戴花翎加布
政使銜惠州民風强悍不法者多公到任後大張示諭
寬其既往予以自新有怙惡不悛者輒繩以法不少貸

府役林麻旺私交洋匪聚眾謀叛公會合文武不動聲

色立擒斬之以故吏畏民懷在任三年無一鬪案亦無
劫案又重修惠州府志文獻賴以有徵焉十一年五月
調署潮州府事會同方津軒軍門查辦鄉間匪徒巨奸
大蠹擒治無遺稍有矜疑者必慎重推詳期無枉濫事
竣創設義塾數十所俾潮民讀書其中漸化其悍鷙之
性蓋潮州俗强悍逾於惠州非德威兼濟不足以生其
畏而格其非也嚴飭所屬清理積案月有稽旬有察十
二年奉委署廣州府公爲政務持大體不以操切爲能
在惠潮兩處均有詩勸民民俗丕變樂吟詠之並泐諸
石焉光緒五年改歸道班遂卜居揚州蒔花木建樓閣

幅巾葛屨日徜徉於紅橋白塔間見者不知其爲貴人也光緒辛卯三月卒壽七十歲晉封榮祿大夫著有三十二蘭亭室詩存十二卷約園詞四卷贊曰

廣文一席自古歎爲冷局公乃由斯奮迹躋金門登玉堂文章吏治光燭桂海間洵豪俊之士哉或以富貴不歸故鄉爲公病余嘗考歐陽公致政之後不返廬陵而卜居穎上達人之見蓋非迂士所知也

劉開第傳

舉人
劉翰屏 邑人

劉開第字鑾坡大城人孝廉煦子也幼承家訓工書法

有翰苑才年十七補博士弟子員道光甲辰 恩科領

鄉薦十二名年甫弱冠益肆力於學書法亦日進家藏金石最富上自鍾王下至趙董心摹力追無不得其神髓尤善擘窠大書雄秀獨絕求書者踵相接藏棄之以爲寶公雄於文春闈屢高薦不售泊如也咸豐丙寅銓授教職光緒己卯訓導慶雲驗看至省謁爵閣督憲李相見握手曰老同年猶安居冷官耶意欲提拔之公遜謝若不喻其意者在任十二年教士有方循循善誘待人樂易和平從遊者如坐春風中士民感德恭送牌傘辭之不獲邑富人馮氏涉訟來求關說請以千金爲公壽公笑曰吾不使造孽錢也凡求書送潤筆者皆力卻

之未嘗受一縑而事之有益於民者則任勞不倦光緒六年以勸捐積穀出力制府咨獎五品頂戴是歲秋邑侯吳國棟修慶雲縣城委公監工民皆用勸又蒙獎紀大功一次致仕後主講青縣永安書院公樂於育才恪遵家法一時若本邑劉慶鴻劉翰屏任邱孔憲墀慶雲劉統疇等皆舉孝廉青縣陳恩寶得選拔桃李盈門稱極盛焉在青邑勞於課士得風痺之疾丁酉冬卒於家壽七十有八著有青照草堂詩稿誥封奉直大夫

贊曰公書顏筋柳骨而應求則終身不倦公品金和玉粹而臨財則一介必嚴至謝絕權門尤足抑奔競之風

而勵清廉之節求諸古人所謂和而介者歟使公早入玉堂必能潤色鴻業位不稱德遠近惜之然翰墨妙天下猶足爲闔邑光也

鄧汝瀚傳

鄧毓怡 邑人

鄧汝瀚字鶴汀大城人少有才思弱冠補博士弟子員秋闈屢薦不售遂汲汲於古不以詞華爲業常曰自顧無濟世才不堪作官吏若得橐筆萬里徧歷諸名勝使湖光山翠汪洋心目間吾亦足了此生矣光緒九年從叔贊元公出守沅郡以公高潔善詞章使隨任課二子讀且於簡牘之暇互相唱和一時湘楚諸名士得其詩

者莫不以得一覩面爲幸皆曰鄧君詩如其人殆朗月
清風非塵俗中所有也平生和平純厚不談人過失有
少年妄論者必婉言勸止之家故貧無子薄田二三畝
夫讀婦織晏然自安得資沽酒卽招友人就花陰月地
歡飲大醉或勸阻之且教以謀生計公曰吾老且拙營
營非所長得與二三知己消遣暮齒幸事也安用履厚
席豐爲仍澹泊如故恆數日不舉火學粟里乞食故事
而其爲詩聲出金石曾不作一怨尤激切語亦可想見
其爲人矣光緒丁酉卒於家壽六十有三著有楚遊吟

草溪篁小舍集各四卷贊曰

古人云詩人少達而多窮如公者負異才至性而奔走數千里困苦以歿惜哉然困窮不足累其心復能於一歌一嘯得江山之助花酒之趣安知非天之厚善人而以清福畀之也於戲安命順天如公者亦可以風矣

人

循吏志

儒者自束髮以來莫不思登仕版爲國宣猷上之爲皋夔稷契下之爲召杜龔黃爭自濯磨以無負委任之至意平舒風俗近古生斯土者類皆悃悞無華內而朝官外而守令以及爲師儒者皆有兩漢循吏風非虛語也故備錄之以繼漢唐之盛且望後來者進而益上云

王伽傳 隋書第三十八卷

王伽河間章武人也開皇末爲齊州行參軍初無足稱後被州使送流囚李參等七十餘人詣京師時制流人

並枷鎖傳送伽行次滎陽哀其辛苦悉呼而謂之曰卿輩既犯國刑虧損名教身嬰縲紲此其職也今復重勞援卒豈獨不媿於心哉參等辭謝伽曰汝等雖犯憲法枷鎖亦大辛苦吾欲與汝等脫去行至京師總集能不違期不皆拜謝曰必不敢違伽於是悉脫其枷停援卒與期曰某日當至京師如致前却吾當爲汝受死舍之而去流人感悅依期而至一無離叛上聞而驚異之召見與語稱善久之於是悉召流人并令攜負妻子俱入賜宴於殿庭而赦之乃下詔曰凡在有生含靈稟性咸知好惡並識是非若臨以至誠明加勸導則俗必從化

人皆遷善往以海內亂離德教廢絕官人無慈愛之心
兆庶懷姦詐之意所以獄訟不息澆薄難治朕受命上
天安養萬姓思遵聖法以德化人朝夕孜孜意在於此
而伽深識朕意誠心宣導參等感悟自赴憲司明是率
土之人非爲難教良是官人不加曉示致令陷罪無由
自新若使官盡王伽之儔人皆李參之輩刑厝不用其
何遠哉於是擢伽爲雍令政有能名

鄧希皋傳

劉 棊

鄧公諱希皋字襄雍邑鎮安里籍其先山左之蒲臺人
也祖諱金起家明經任夏津丞父之彥邑庠生後以公

貴贈西曹主政公少而穎異日誦萬餘言每試輒冠軍
丰姿特秀鳳舉鴻軒望之飄飄若仙性孝友常因弟貧
以家人產讓之簞瓢陋巷自處泊如也萬曆癸卯薦賢
書公初不爲動毅然以聖賢爲己任讀書交友仍如諸
生時逾數科不第始受蒲臺令卽公先人舊里也蒲有
鹺利甚巨公至悉屏去士民懷之口碑藉甚陞青海監
軍治青一如治蒲公素負正氣不工奔趨隨遷鳳倅分
理正陽鎮關利頗饒公不爲染一切常例痛除之且勒
石以垂永禁因而內召佐光祿累級刑曹正值內豎擅
權獄多羅織公獨秉公主持其全活者甚衆時以京秩

之有才望者出補大郡公遂得中州衛輝府閱月以內
艱歸我 朝定鼎三召不復公仕宦二十餘年廉介自
守不營利不廣田宅惟以課子弟爲事迄今子孫繁盛
悉列鬯宮且極一時君子之選鄰郡以及長安莫不知
有平舒鄧氏也

王价傳

王秉乘 邑人

王价家世萬營村後遷城北十里之樓堤少孤介動必
徇禮言笑不妄發長而讀書邑中每晨詣書舍道經

先師廟必入揖乃往坐齋雖盛暑未嘗去衣巾明世廟時
以貢舉遊京師銓部顧芳春當代偉人也聞价名執二

子受經焉逾年補江南無錫縣縣丞顧聞之駭然來謝
曰公才宜作推知盍早使我聞之价怡然曰豈有受秩
公朝拜恩私第者乎故不敢顧嘉歎再四而去無錫者
卽顧里也舊例縣丞到任糧長初見白銀各五十兩以
爲贄禮里擴三百六十合之可得千八百金价至痛懲
其弊皆屏去一邑驚愕縉紳苞苴不行事不便於民者
與縣主每力爭堂官始怒甚旣而悔曰王公君子也以
故官微而多惠政親友規以不近人情者卽正色曰但
願吾後人人稱爲清白吏子孫足矣安事無義之財爲
卒於官貧弗能完斂事適顧亦謝任歸感价之高潔乃

以自預之孔雀杉木棺贈焉復率學弟子員同贈白金四十子應亨始得扶柩達至鄉迄今無錫志載曰資性狷介政務詳明云

鄧希夔傳

鄧希夔字見華大城人衛輝府知府希皋之弟也幼讀書刻苦治尙書通達政體明泰昌元年恩拔貢生銓授山東齊河縣知縣齊河在濟南府西五十里地當驛路冠蓋驛騷貂璫橫行民甚苦之公愛民如子不畏強禦出滯獄黜姦猾齊民大悅立碑頌德公子元襄天啟辛酉拔貢生任青島府通判後先濟美有循良聲贊曰

嘗讀舊志襄雍公傳輒想見其壘篋競爽德行政事炳焉可觀獨其文章磨滅不少概見蓋數百年於茲矣然其子孫繁衍世守詩禮能述祖德於無窮非仁聲入人之深何以至此俟求得祝阿邑志備錄公之實政以光循吏之傳焉

王照乘傳

王照乘字孟犀號允大大城人父良眉邑庠生母張氏明安鄉伯之女也崇禎甲申李自成蹂躪畿輔民各鳥獸散張氏促夫攜子避亂曰夫婦同行勢不獲兩全我自爲計必不敢辱夫子遂自經死良眉終身不再娶照

乘思所以報母者計不可得往往書聲與哭聲雜強顏承父歡父病刲股以進病卒不起哀毀骨立旣長目擊滄桑遂絕意舉子業客遊幕中先事料成敗如燭照計數嘗歎曰郗超忠於所事而見絕於父徒爲人作嫁衣耳蕭曹以刀筆吏封侯獨非人乎俛就吏階授青澗驛丞外應驛傳內輯流亡無何王輔臣負恩爲變知照乘有經濟才且得士民心下令曰有能生致王丞者與千金否則赤爾城照乘曰吾何惜一死不活城中百萬人此顏杲卿罵賊時也城中父老擁馬首不得行照乘從容慰諭單騎出城見賊曰吾戴吾頭來矣豈肯苟且偷

活哉賊欲收民望曲意使降大罵不屈囚之其子鎮星
夜馳四百里赴畢大軍將軍求救將軍蹶然曰吾援兵
旦暮至爾當先驅鎮急馳望城大呼曰救兵十萬至矣
賊大驚擾照乘與李守備潰圍出助大將軍克復延安
府權授知安定縣事扶傷恤災曲爲撫字民忘兵燹之
苦以郢誤罷官歸居淮之濱後淮陽兩郡大水大司馬
靳貴稔知照乘名命監理河工凡有險急輒曰王令安
在照乘櫛風沐雨悉心籌畫刻無甯晷保全生命與夫
田廬冢墓無數淮人尸祝之考績居最俄以積勞成疾
時康熙癸酉七月五日也易簣時訓子以忠孝清白無

玷家聲翊日而卒淮安刺史王穀韋誌其墓

王甯寰傳

劉漢儒

余孩時卽聞邑有甯寰王先生名旣余爲諸生每誦其制義心服之每試必冠軍數上秋闈幾售而終落一時新進者無不愧劉蕢矣竟以鄉選授伊陽學博三年當種花羊城乃向所知辭之曰倘得國學一席徧覽石鼓銅斗之文庶幾可了一生何須五斗折腰爲渠轉北雍一味澹泊出其俸金羅古今書籍日事游詠下筆千萬言宏博奧衍見之者以爲漢人文章六朝以下不及也恆爲輦下諸名公所獎籍比之服虔文中之流無何以

耆老未得大展其蘊抱惜哉子立極慨慷有氣節頗嗜
麴蘖白眼傲世卻不作低昂態以子炤千登賢書卽拋
卻青衫雖終窶且貧甘之如飴而炤千有儁才固甯窶
先生留有餘以付之者授山西司李三載卽賦歸田其
清白得之家傳但其生也晚兼值兵燹之變而乃祖之
遺文剩簡未得傳之人間余每詢之爲之扼腕云

李翼鵬傳

李翼鵬字弱水號翥九大城人順治乙酉舉於鄉丁亥
副進士授順德府平鄉縣學博捐資葺學宮立社課士
平鄉六十年不發解翼鵬訓迪有方弟子趙培基聯捷

成進士人文蔚起甲午丁父艱歸服闋補正定府無極
縣教諭戊戌陞廣東西甯縣令西甯自戊己以來頻遭
寇躪戶口星散幅員八百餘里皆山虎豹傷人且縣治
創設未久各有土官跋扈自雄又值請藩移鎮軍需孔
亟翼鵬乃親入虎穴出至誠與民相信馴者給牛種寬
舊欠獷者溫語告誡示以禍福三年而民始蕃乃開羅
旁羅同二墟資民貿易置學田以贍貧士建縣署學宮
書院城樓城隍廟祀關梁曩所廢闕罔不具舉時值公
務繁興下令採大礮車王穀王船及神柴青藤等民皆
思竄翼鵬瀝血上章爲民請命事乃得寢民立生祠尸

祝之計冊兩次皆注循良第一甲辰秋擢奉天府承德縣尹承德新造無縣治印信亦無胥吏百姓露宿帳處荒烟朔雪中翼鵬乃首請鑄印信以防詐僞招人民以固邦本每隨朝會與各部滿臣請嚴八旗蒙古之禁以爲聲教必自輦轂始積二歲有民二千四百餘家編爲二十四里戊申遇覃恩晉承德郎加奉直大夫歸田後以詩酒自娛無疾而卒著有瀝血披誠集尙書劉棻誌其墓

王公任傳

王公任字朋范號西菴大城人少讀書過目不忘順治

丁酉舉於鄉己亥成進士謁選得浙江衢州府開化縣令開化吏猾民頑世家大族多不法又滇蜀未平上官督餉無虛日公任至大破積習犯科者悉置於法苞苴請託俱不得行復爲之嚴期會定約束一切征輸期於立辦以此致怨失吏民心三衢爲八閩門戶軍帥絡繹不絕公任供應糗糧芻茭事皆井井督撫愛其才課績爲兩浙第一時因星變

詔下州縣皆得直言因上疏言

皇上當修德以回天變又請不時召對詢民間疾苦兼可
知人優絀又請數

御經筵復詹事府官並請禁二氏之學使勿惑邪教其言俱愷切深至康熙二年癸卯科省試分校所拔皆名士事竣撫軍酌酒相賀且曰我固知爾才前見奏疏矣每欲特薦因逋賦纍纍中止此豈勢豪抗衡耶公任聞撫軍言果於必行奸人益悚懼不安夜僞爲盜斬門入署遂遇害後撫軍范承謨至白其寃始得歸葬

吳煜傳

吳煜大城人天姿英邁性情沈毅少以才名著聞遐邇邑中劉馬諸大家咸推重之家居循循孝友嗜讀書有神悟於九經觀其會通而獨出確解於子史百家言莫

不究義理之歸故其爲文卓然多貴弱冠補博士弟子
員每試輒冠軍康熙丙午登賢書屢躋春闈遂以霖雨
之資爲時雨之化初司鐸灤州而士風丕變繼司鐸於
邢之澧水誨人不倦匡直輔翼曲盡裁成十餘年中被
其德化者咸有關西夫子之慕焉又以截取知縣出知
河南崧山縣踰年彫敝者豐逃亡者復平糶緩征結挂
簿之耗召父杜母之稱藉藉人口凡命案可矜者不惜
考成以救之災傷可憫者不顧身家以恤之至於建義
塾立育嬰堂猶其餘事焉耳公性嚴正不可干以私秋
闈入簾爲同考官因抑請託得罪當路劾以虧空公兩

袖清風無從賠補闔邑士民感公恩釀金以償始得結
案公以無辜被劾鬱鬱不得自明遂發病卒於任所邑
人雨泣如失父母賻饘雲集乃得歸里葬焉贊曰

公經術湛深自廣文以至吏治皆以樂育人才培養元
氣爲先務雖職膺繁劇案牘勞形而手不停披口不絕
講使大用於世必能移風易俗卒之能不得展豈非天
哉公平生工制藝積至數千篇經指授而成名者不可
勝數也循吏儒林兼擅其美嗚呼不朽矣

吳國振傳

吳國振大城人雍正壬子科舉於鄉時方弱冠期捷南

宮以酬壯志乃屢躋春闈才不得展遂幕遊於永清縣
縣令宗誼也公在署中協理繁劇裁決如流及至用一
絲一粟亦莫不惟公是問贊襄數載政簡刑清闔邑士
民無不感恩頌德焉乾隆中選授陝西山陽縣知縣山
陽蕞爾小邑地瘠民貧公愛民如子疾痛疴癢息息相
關勸開墾以濟民生息征徭以抒民困凡有益於民者
無不爲勞心焦思約已腴民數年而後民賴以康後受
命修城程功非細公但期完固不計經費城功告竣賠
累若干而城郭之堅至今利賴凡此皆實心實政之所
爲而非虛與委蛇者之所能幾也但存心過厚凡府史

胥徒莫不推心置腹無少猜嫌遂以信任之故失於防
檢竟挂彈章解職山陽士民如失父母呼籲城市相與
挽留者以億萬計格於例不許回籍之後數年而卒兩
袖清風無以爲斂賴親友資助始克葬焉贊曰

公勤於撫字有古循吏風而疏於察吏獨何與觀過知
仁斯之謂矣然城垣之保障永固棠陰之遺愛長留揆
諸兩漢循良何多讓焉

劉瑋傳

劉瑋字琢山號華峯大城人總憲漢儒曾孫也性英敏
善屬文乾隆壬午成進士授陝西延安府膚施縣令下

車卽清案牘崇學校勤農事正民風日坐堂上民有訟者立決不少停其有待質人犯遠在鄉村則計地限日如期而結訟獄遂稀邑有常平倉舊例春借秋還每入穀一石外加一升謂之計數穀瑋曰此民膏也何堪如此駿削立革之城南亞支山有杏子河流至城南會濯筋河東入延安界水漲則南關民廬多被漂沒瑋捐俸於東山下開溝建閘引水而東又修尹家溝堤以禦山水民乃得安乾隆壬申夏山濤怒漲將沖城而入民大恐瑋步禱水濱不移時水退尺餘及晚則漸次歸槽城南有虎傷樵夫瑋爲文牒山神並選丁壯搜山得三虎

一豹遂絕迹焉十七年冬延安兵以餉缺而變吹角揚旗參府大懼不知所爲瑋步至西山申言利害鼓以忠義且許以度歲資亂兵皆叩首散事定後潼關廳紀某歎曰劉君聞難先登片言定亂誰謂書生無膽耶十八年署安塞縣事城西山溝內有樵夫被斧傷死者瑋驗其傷痕令近山居民有斧者俱按數報出聚集村民執斧比驗並察言觀色立獲兇身民以爲神民有白姓者其姪遠出不歸遂疑其爲姪婦毒死鳴之官並指一枯骸以爲據瑋曉之曰此積年枯骨也烏可執此刑求容緩圖之月餘而其姪歸延川縣有命案二株連數十人

憲府委之往至則盡釋牽連諸人細究兩案本犯盡得其情事竣民焚香跪送數里不絕二十三年署綏德直隸州領清澗米脂吳堡三縣素多盜賊勾連衙蠹任意作奸瑋至則盜逃吏肅農商歌之曰卓哉劉太守下車萬民安時屢旱待賑而倉無餘糧瑋請於大憲就近撥運山西米穀以濟之復緩催科以舒民力平市價以濟民食並親查所屬三縣民無流亡令亦愈加勤慎焉二十五年以卓異薦赴

京引見未行卒於任所著有寸香草一卷崇祀鄉賢祠

劉標傳

劉標字準菴大城人雍正壬子癸丑科聯捷進士歷任江南霍邱鳳台雲南甯弭縣知縣皆有仁聲紳民戴德後署貴省威甯州知州介節自持不事權貴遂以剛方忤當事諸上憲勒索多方伺其過失既而有旨謂威甯州虧欠若干猝然正法不容伸辨及封其家而抄之四壁蕭然毫無儲積聞者悲之子孫充榆林軍其從姪孫城檢閱遺書得威甯印簿一卷載諸上司索銀數目總計其數正與欠欸相符慨然曰乃知當年欠欸皆諸上司所需索也城素慨直容貌魁梧才情敏贍乃擊登聞鼓叩闕鳴冤諸台憲詳爲申理誅其上司之索銀者八

人充軍者數十人而攤欵之例由此立焉

薛覲上傳

薛覲上字朝賓大城人束髮卽從其舅氏劉瑋讀書劉公蓋乾隆壬戌名進士也敦勉孝弟講授文藝皆有師法學遂大進後劉公卒於陝西膚施縣任所公每念及舅氏輒潛然淚下乾隆己卯科與弟士藩同登鄉薦初任河間肅甯縣教諭繼升甘肅甯遠縣知縣文鄉試入簾者三次武鄉試又爲同考官值回匪作亂公借兵於楊士師家以平其亂楊蓋宋將楊業之後也夜黑山深不辨東西倏有紅燈引路一夜行五百餘里乞師至連

戰皆捷賊遂蕩平此固聖天子百靈相助亦由公之至誠所感也及敘平賊功升甯夏府水利同知告歸壽終於家年八十餘猶手不釋卷輒自吟曰老來還讀舊時書著有詩稿一卷門下士多顯達者如朱公承烈由翰林官江西鹽法道劉公毓瑤由舉人官四川石泉縣知縣子孟勗由舉人任阜平縣教諭惟年代既遠行述無存俾嘉言善政不盡傳於世也惜哉

劉青甸傳

劉青甸字尹東大城人幼讀書難於記誦而神於領悟凡所讀者各有心得尤邃於易啟誘後學寒暑不倦以

故出其門者多知名士乾隆乙酉科登賢書選授正定府靈壽縣教諭靈壽士好奇服公訓之曰儒者讀書非爲學文章取科第也衣冠服御必循禮法乃無忝儒者之躬士人感之俗遂一變靈壽夙無學舍前任某因捐貲與士民相齟齬公聞之曰事不行而強以必行適以取辱耳乃自賃居授徒甫二年而及門受業者爭欲出貲助修學舍旣落成勒碑於櫺星門以紀其事云內有先生書策不染纖塵外有弟子門牆均沾化雨典型率舊堂宇更新聞者羨焉邑有生員吳士麒士麟因析產而訟者邑令將吳某兄弟發學戒飭公坐明倫堂諭之

曰凡析產而立券息爭者爲愚民設法耳兄弟青衿而因產成訟豈不貽士林笑乎且堂曰明倫倫之以分重者曰君臣征利相交有乖盛德倫之以義合者曰朋友通財不吝堪播美談何必行刻薄工計較於兄弟間也吳某聞之皆頓首悔過遂爲兄弟如初後解組歸里士民皆戀戀不忍別云贊曰

以身教者從以言教者訟觀公之在靈壽可謂善以身教者矣士之心悅誠服也宜哉

楊鶴年傳

楊鶴年大城人世居城南遠南頭幼時讀書機警絕倫

曉暢事理一切繁劇之務未有能難之者鄉先生皆器重之謂具此長才他年建樹定有可觀也嘉慶中補博士弟子員屢試京兆未售由謄錄差滿選授河南襄城縣典史公在任擿姦發伏無隱不彰先後邑令皆倚公如左右手代辦堂務十餘年無虛日有武舉人某害其兄於路旋以被劫身死自行呈控公與邑令趙公同往檢驗並不見兇犯蹤迹公在左近檢一剔齒銀鍼回署提審原告見其腰佩容刀公曰帶刀何爲其人曰此處原以帶刀爲飾公取觀之其刀鞘上他物皆具獨缺一鍼問曰此鍼何在其人曰久已遺矣公出其所檢之鍼

插之吻合公笑曰罪人斯得矣汝刺殺汝兄時遺此物耳汝既害兄又欲爲官長累耶一訊而其人伏罪又有數人爭毆而一人身斃者趙令檢驗不見傷痕搔首茫然無從判斷公曰人安有無傷而至死者忤作云惟兩股中間微有紅暈寸許公曰此卽傷也提審諸人有一人氣色稍異公指之曰是此人腳踢致斃餘皆無罪詢之果服其他挾摑隱情大率類此襄城士民恭頌以詩云君在花封分化理人於蔀屋被恩膏非溢美也公子名暉字月秋邑廩生幼最聰穎一目數行淹通經史賦學楷法自成一家皆公勤政餘暇所親爲指授者也公

經濟文章兼擅其長數世後猶藉藉在人口云贊曰
昔周茂叔赴分甯簿縣有疑獄一訊立辦邑人驚曰老
吏不如也蓋其聞道最蚤故能遇事剛果有古八風公
以聰敏之性長於聽斷媲美濂溪孰謂風塵中無傑士

劉祝永傳

劉祝永字子貞大城人道光乙未舉於鄉下帷攻苦益
自策勵家貧親老藉舌耕供菽水者三十年咸豐甲寅
選授四川大竹縣令竹民素好訟往往以小事故張大
其辭以聳聽案牘山積祝永親自批閱不假幕賓手候

訊者日數十獄隨訊隨解虛者嚴責寃者立釋之折獄以仁慈爲本不憚再四開導以化鄉愚以故訟獄日簡民乃大和竹邑胥吏最多與奸民相固結以無爲有誣告良民甚至守候終年不獲投訊稍有貲產者多以此敗其家祝永廉得其情量道路之遠近與以定期至期不送審者嚴責胥役民無守候之苦胥亦無從售其奸凡健訟爲鄉里患者立命械至一訊而服民驚以爲神此風遂息每課士子必諭以先德行而後文藝尤崇尚經學士子皆憤勵切劘科第遂日盛時兩湖軍需孔亟大吏札飭地方官勸捐緩屬同寅皆有難色祝永曰此

時 國帑空虛若不實力勸辦何以報

君恩於萬一耶卽徧請紳民加以優禮感以忠言人皆爭輸恐後一日捐金至八萬餘其得民心如此竹邑山深盜眾時時劫掠祝永懸重賞諭百姓遇盜格殺勿論不數月悉獲渠魁殲之盜賊皆散亡庚申六月以病解職歸子毓珂爲定陶令就養署中訓之曰居官必儉以養廉勤以補拙無他道也同治乙丑起病假吏部帶領引見奉 旨以原缺補用至蜀時雙流縣有上控案紛紛數十年大吏委祝永訊之曲直立判旋委捐輸事宜以積勞成疾卒於蜀

劉毓珊傳

劉毓珊字鐵村大城人四川岳池縣知縣毓瑤之弟也幼卓犖有幹略道光中補博士弟子員食餼時甫弱冠以廩貢捐教職歷署東鹿棗強東明涑水祁州諸處咸豐五年署高邑教諭兼攝訓導正色型人力崇古處凡有裨於人心風俗者率先爲之士民皆悅服同治三年捻匪宋景思侵擾趙州屬直犯高邑邑令畢世榮與公商辦禦賊事宜公請乞師臨城賊至勿與戰俟臨城兵至內外夾擊必大敗之外委鎖某曰城殘缺難守不如迎擊以挫其銳畢公兩從之命人乞師去訖而自與鎖

某率師禦賊大戰良久二公皆陣亡城中聞之兇懼土賊蠡起典史姚某棄城遁斯時官守惟公一人城之陷卽在呼吸間公獨立不懼密令人梟獄中死囚首懸諸街中謂土匪曰爾等洶湧欲何爲眾曰鹽店當商民恨之刺骨欲得而甘心焉公厲聲曰爾等竟不畏王法耶畢公現得勝回署擒斬捻匪數十人矣汝輩各宜安靖勿輕滋事土匪覘之信且疑而臨城之兵已至矣公收合兵勇與領兵官杜崧年協力守城擒匪知城守旣堅不敢攻而退旣解嚴杜崧年曰嘻此城不失君之力也我將面稟州尊爲君保舉此功豈容沒乎卽詣陳知州

鍾祥所力陳其功公慮己有功而姚典史見罪也曰損人自利吾不忍爲乃別作一稟達諸州尊陳歎息曰劉公志不在名也遂依所稟詳辦獎敘俾在任候升後公以年邁告歸邑之人扶老攜幼餞行者數十里不絕公止之曰汝等勿勞遠送矣吾無他贈惟願士勤讀農力耕風氣蒸蒸各得其所余雖歸卽無異在此也乃洒淚而別公退居林下以姪漣年貴誥封通奉大夫壽八十有二贊曰

公定變於俄頃成功而不居使居當路必有所建樹乃竟以一羶終老惜哉然小試其端已定足以報國矣

劉元亨傳

劉元亨字會廷大城人生而穎異髫齡舉止卽異常兒其父星池公教讀爲業見公沈默寡言欣然有光大門閥之望焉課以詩書過目者皆能成誦家貧日不舉火忍飢而讀意豁如也嘗負薪讀書中野雖甚勞倦而吟誦之聲不絕於口鄉先生咸歎異之弱冠應童子試未入彀意殊怏怏又艱於資斧遂邁疾於道有永清尹遜甫者性好善扶至其家調養累日送之歸公感其恩誼蒙其砥礪每思有以報之益自奮勵不數歲補博士弟子員爲養親計歲就館且受業任杏田明經之門師深

器重之公與諸弟相友愛室王宜人亦曲盡婦職以故家雖困苦頗能得堂歡道光甲辰公母趙氏卒事父愈謹而進取之志亦益堅咸豐辛酉舉於鄉座主爲畢尙書道遠畢總督倉場派公倉差矢慎矢勤夙夜匪懈迭以勞績保奏奉 旨以知縣儘先補用加同知銜準予五品封典尋授唐山縣教諭翁遇 覃恩 誥封奉直大夫喜形於色謂公曰吾所望於汝者原不止此然吾老矣猶及見汝登仕版於願已慰雖冷署微秩亦可就養以娛暮年豈澀飯稀羹不足養吾老耶公抵任後擬以安車迎養封翁竟壽終於家公夙無宦囊丁憂不能

歸幸唐山汪令率同寅及邑紳賻之始得旋里公在任時民以抗糧幾成大難公以禍福喻解之境內易危爲安非公則殆矣退居林下仍以課徒爲事臨終時猶諄諄以讀書樂善爲子孫勗云時光緒壬午嘉平月也壽五十有九贊曰

惟公之學具有淵源兮惟公之德光於里門兮惟公之運坎珂奚論兮名儕仕宦業鮮田園兮但將清白貽厥子孫兮

鄧天符傳

鄧天符字贊元大城人天一之弟也道光中補博士弟

子員咸豐初遵例捐郎中入戎曹十年請假回籍籌辦團練同治七年大水年饑哀鴻遍野公發粟爲乾餼以濟鄉鄰就食者日以三千計自冬徂春全活無算八年補武選司郎中十一年截取繁缺知府引見奉旨照例用光緒三年丁內艱歸服闋補職方司郎中總辦武庫司事務提調武圍鄉會試者四次公嫻於戎律辦事精詳兵部尙書沈公薦於朝奏對稱旨九年七月簡授湖南沅州府知府下車後訪民間疾苦求郡政得失如治屯防整學校飭戎紀諸大端次第修舉而於興水利則尤加意焉沅郡當滇黔之衝牂牁帶水建甌直下與沅

水合又匯猺苗谿崗諸支流而東跨江有礪曰龍津極
一郡之勝概公疏之鑿之時率僚佐流連登覽詢悉民
艱必使官紳庶民聯爲一體郡城久圯公捐廉倡修不
兩月而功成丙戌歲大饑米價陡長富民屯粟居奇窮
民將乘機攘掠公嚴辦平糶之法數日中籌穀三萬石
民情大安次年麻邑匪徒聚眾劫掠至數千人公督飭
營弁殲厥渠魁除莠安良頌聲交作卞頌臣制軍優獎
之沅俗有溺女之風公設育嬰堂廣收孩幼每年全活
千餘口南寺僧人當地於豪民蕭九元名下僧欲回贖
蕭貪賴其田而不肯與僧無如之何欲以此田歸諸官

公捐俸五百金贖之分給芷江縣東鄉鍾毓書院四十畝郡城中名山書院四十畝育嬰堂四十畝書院齋長張清泉等感公德設長生祿位牌朝夕祝不衰士子肄業有資文風因之丕變在任六載殫精竭力心血大虧己丑歲決計歸田時患腹泄蓋爲瘴癘所傷也十六年庚寅九月卒於家壽六十一歲誥授中憲大夫

贊曰公之先有爲郡守者曰希舉公贊元公復以五馬世其家可謂濟美矣予聞公在沅時府試生童執法不阿不恤謗讟拔取真才如冰壺玉尺尤可見辦事之認